

Na osnovu člana 56. stav 2. Zakona o organizaciji organa uprave u Federaciji Bosne i Hercegovine („Službene novine Federacije BiH“, broj 35/05) i poglavlja III stav 1. tačka 4. Smjernica za uspostavu i jačanje interne kontrole kod budžetskih korisnika („Službene novine Federacije BiH“, broj 19/05), ministar za boračka pitanja Kantona Sarajevo
d o n o s i

PROCEDURE KOMUNICIRANJA SA OKRUŽENJEM MINISTARSTVA ZA BORAČKA PITANJA KANTONA SARAJEVO

I OSNOVNE ODREDBE

Procedurama komuniciranja sa okruženjem (u daljnjem tekstu: Procedure) Ministarstva za boračka pitanja Kantona Sarajevo (u daljnjem tekstu: Ministarstvo), regulišu se:

- Principi komuniciranja sa okruženjem,
- Odnos Ministarstva prema okruženju i
- Završne odredbe.

II PRINCIPI KOMUNICIRANJA SA OKRUŽENJEM

Ministarstvo je osnovano za obavljanje upravnih i stručnih poslova iz nadležnosti Kantona Sarajevo za oblast boračko-invalidske zaštite, u kojima se izvršava ili osigurava izvršenje zakona i drugih propisa i odgovara za njihovo izvršenje iz oblasti koje se odnose na:

- zaštitu boraca, dobrovoljaca i organizatora otpora, veterana, učesnika rata, ratnih vojnih invalida, mirnodopskih vojnih invalida, porodica šehida i porodica poginulog, umrlog i nestalog branioca i nosioca najviših ratnih priznanja, ratnih zarobljenika i učesnika narodnooslobodilačkog antifašističkog rata 1941.-1945. godine,
- vođenje i podržavanje aktivnosti na očuvanju tekovina odbrambeno-oslobodilačkog rata 1992.-1995.godine, održavanje manifestacija i drugih sličnih projekata.

Ministarstvo je dužno u poslovima iz svoje nadležnosti saradivati sa svim međunarodnim posmatračkim tijelima za ljudska prava koja su osnovana za Bosnu i Hercegovinu i Federaciju Bosne i Hercegovine, kao i sa nadzornim organima koji su osnovani na osnovu međunarodnih dokumenata navedenih u Aneksu Ustava Federacije Bosne i Hercegovine.

Ministarstvo je obavezno da priprema i daje odgovore na pitanja organa zakonodavne, odnosno izvršne vlasti koja se odnose na izvršavanje zakona i drugih propisa iz njegove nadležnosti, te o stanju i problemima u oblasti boračko-invalidske zaštite.

Da bi steklo povjerenje javnosti, Ministarstvo u obavljanju svojih aktivnosti primjenjuje slijedeće principe:

- načelo zakonitosti,
- transparentosti,
- javnosti,
- odgovornosti,
- efikasnosti,
- ekonomičnosti,
- profesionalne nepristrasnosti i
- političke nezavisnosti.

Ministarstvo mora kontinuirano preduzimati aktivnosti na uspostavi što boljih i racionalnijih veza sa okruženjem.

Konstantan zadatak Ministarstva je ostvarivanje dobre saradnje i jačanje veze sa okruženjem.

II ODNOS MINISTARSTVA PREMA OKRUŽENJU

Odnos Ministarstva prema građanima

Ministarstvo u rješavanju zahtjeva građana, a koji se odnose na ostvarivanje njihovih prava i pravnih interesa, ili izvršavanje zakonom predviđenih obaveza, dužno je te zahtjeve rješavati u skladu sa zakonom i drugim propisima i u rokovima predviđenim zakonom.

Pri rješavanju zahtjeva Ministarstvo je dužno u kontaktima sa građanima postupati na način da se u svakoj situaciji poštuje dostojanstvo ljudske ličnosti i njihov moralni integritet.

Odnos Ministarstva prema drugim organima uprave

Ministarstvo je dužno saradivati sa organima uprave kako na istom nivou vlasti, tako i sa organima uprave drugog nivoa vlasti u svim pitanjima koja su od zajedničkog interesa za te organe uprave.

U ostvarivanju međusobne saradnje Ministarstva i drugih organa vlasti istog nivoa, Ministarstvo je obavezno da dostavlja određene podatke i informacije sa kojima raspolaže i do kojih dolazi u obavljanju svojih poslova, s tim da prema potrebi može osnovati zajedničke stručne komisije, ili radne grupe za izvršenje određenog zadatka, organizovati savjetovanja i ostvarivati druge oblike međusobne saradnje od zajedničkog interesa o čemu zajednički odlučuju ministar Ministarstva i rukovodioci zainteresiranih organa uprave.

Odnos Ministarstva prema organu izvršne vlasti

Ministarstvo je odgovorno za svoj rad i stanje u oblasti boračko-invalidske zaštite Vladi Kantona Sarajevo.

Odnos Ministarstva zasniva se na obavezi provođenja zahtjeva i smjernica koje u skladu sa Ustavom i zakonom utvrdi Vlada Kantona Sarajevo za oblast boračko-invalidske zaštite.

Vlada Kantona Sarajevo ima pravo razmatrati rad Ministarstva, ispitivati stanje u oblasti boračko-invalidske zaštite i pokretati postupke odgovornosti protiv rukovodećih i ostalih državnih službenika, ako ocijeni da Ministarstvo ne izvršava pravilno i na zakonom predviđen način poslove iz svoje nadležnosti i da su zbog toga nastale, ili mogu nastati štetne posljedice po prava i dužnosti građana, pravnih lica i drugih subjekata, ili posljedice za javne interese.

Odnos Ministarstva prema organu zakonodavne vlasti

Ministarstvo je odgovorno organu zakonodavne vlasti za zakonito, potpuno, efikasno i profesionalno obavljanje poslova iz svoje nadležnosti.

Ministarstvo je obavezno na zahtjev organa zakonodavne vlasti podnositi izvještaj o svom radu, o stanju u oblasti boračko-invalidske zaštite i o izvršavanju zakona i drugih propisa, odgovarati na pitanja organa zakonodavne vlasti i slično.

Odnos Ministarstva prema ombudsmenima

Ministarstvo je obavezno omogućiti ombudsmenima na njihov zahtjev nesmetano ispitivanje djelatnosti Ministarstva, odnosno rukovodećih i ostalih državnih službenika i namještenika Ministarstva za koje postoje podaci da su negirali ljudsko dostojanstvo, prava i slobode, uključujući provođenje etničkog progona ili održavanje njegovih posljedica.

Ministarstvo je obavezno osigurati sva službena dokumenta i osigurati saradnju svakog državnog službenika i namještenika posebno u pribavljanju potrebnih informacija, dokumenata i spisa.

Odnos Ministarstva prema pravnim licima

Ministarstvo saraduje sa pravnim licima po pitanjima iz svoje nadležnosti koja su od značaja za rad Ministarstva ili su od interesa za rad tog pravnog lica.

Odnos Ministarstva prema javnosti

Ministarstvo je obavezno na zahtjev pravnih lica iz oblasti štampe i drugih sredstava javnog informiranja pružati obavještenja i davati podatke o pojedinim pitanjima iz svoje nadležnosti koja su od neposrednog interesa za rad sredstava javnog informiranja.

Ministarstvo će uskratiti davanje podataka ako podaci predstavljaju državnu, vojnu, službenu ili poslovnu tajnu.

Ministarstvo daje podatke u skladu sa Vodičem za pristup informacijama u Ministarstvu za boračka pitanja Kantona Sarajevo broj: 06-05-11428-2/02 od februara 2002. godine.

Odnos Ministarstva prema institucijama Bosne i Hercegovine

Ministarstvo je dužno ostvarivati odgovarajuću saradnju sa nadležnim institucijama Bosne i Hercegovine u onim pitanjima koja su zakonom Bosne i Hercegovine data u nadležnost Federacije Bosne i Hercegovine, odnosno Ministarstva, kao i u drugim pitanjima od zajedničkog interesa i međusobno se dogovarati o načinu obavljanja tih poslova. S tim u vezi Ministarstvo je dužno na njihov zahtjev u pitanjima iz svoje nadležnosti dostavljati određene podatke, spise i drugu dokumentaciju koja je neophodna za njihov rad.

III ZAVRŠNE ODREDBE

Izmjene i dopune ovih Procedura vrše se na način i po postupku za njihovo donošenje.

Ove Procedure stupaju na snagu narednog dana od dana donošenja.

Broj: 06-34-6707/10

Sarajevo, 31.03.2010. godine



MINISTAR

Hajrudin Ibrahimović